

que fuere derecho e justiçia. E enbiaron nos pedir merçed que nos pluguiese dello e lo mandasemos asi fazer e conplir. E nos, entendiendo que esto es nuestro serviçio e pro de la nuestra tierra, tuvimoslo por bien. Porque vos mandamos si los de la dicha villa de Orihuela, e de los otros lugares del dicho regno de Aragon a do se acogieren los malfechores que algunos malefiçios fizieren en la nuestra tierra, los remitieren e entregaren a vos, los dichos ofiçiales, o a qualesquier de vos, para que se faga dellos conplimiento de derecho e de justiçia, que lo fagades vos eso mesmo asi que quando algunos malfechores que ovieren fechos algunos malefiçios se vinieren de la dicha villa de Orihuela e de los otros lugares del dicho regno de Aragon a la dicha çibdat de Murçia, que los fagades remeter e entregar a las justiçias de la dicha villa de Orihuela e de los otros lugares del dicho regno de Aragon, do fizieren los dichos malefiçios, segund sobredicho es. E los unos e los otros non fagades ende al, so pena de la nuestra merçed.

Dada en Soria, veinte e dos de setiembre, era de mill e quatrozientos e diez e ocho años. Nos, el rey.

(50)

s. a.- IX-26. Soria.— Juan I al Concejo de Murcia comunicando que recibieron las peticiones que la ciudad de Murcia les enviò con sus procuradores Alfonso de Moncada y Ferrand Oller. (A.M.M., C.R. 1405-18, Eras, Fol. 164, r.-v.)

Don Johan por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara e de Vizcaya e de Molina, al conçeio e cavalleros e omes buenos e ofiçiales de la noble çibdat de Murçia, salud e graçia. Sepades que viemos vuestra carta e las peticiones que nos enbiastes con Alfonso de Moncada e Ferrand Oller, vuestros procuradores, e con Johan Moraton, vuestro escrivano. E sabed que ellos llegaron a buen tiempo e fizieron e otorgaron en vuestro nonbre lo que le nos mandamos que cunplia a nuestro serviçio, segund lo fizieron todos los otros de los nuestros regnos. E otrosi, nos respondimos a las dichas peticiones e las libramos en la manera que entendimos que cunplia a nuestro serviçio e a pro desa çibdat, segund mas conplidamente lo veredes por las nuestras cartas que sobre ello vos mandamos dar que llievan los dichos vuestros procuradores.

Dada en Soria, veynte e seys dias de setiembre. Yo, Alfonso Ruiz, la fize escrivir por mandado del rey.

